

2. For Li Ye, by Mr. X.

No 咸通 0 1 6

【盖】 失。

【志文】

唐故彬县尉赵郡李君墓志铭并序 从弟乡贡进士□撰 [4th son of Li Deyu]

维大中十四年岁次庚辰夏六月庚辰朔廿六日乙巳，故彬县尉赵郡李君享年三十有五，以疾终于县之官舍。明年夏四月，孤子庄士以使来告，请志于□。独念与君生平交厚，故援翰无辞焉。

君讳焯，字季常，赵郡赞皇人也。曾祖讳栖筠，皇任御史大夫京畿观察使，谥文献公；祖讳吉甫，皇任中书侍郎平章事，谥曰忠公；烈考讳德裕，皇任特进太子少保卫国公，赠尚书左仆射。自文献至卫公三代，功业行事，显于国史，今略不书。君卫公第五子也。生而特禀粹异，不类诸婴儿，故尤所钟爱，一寝一食，未尝辄远公之左右。才十数岁，能通鲁史。与所授经老儒相评旨义，儒不能屈。会昌中，卫公自淮海入相，君已及弱冠，而谨畏自律，虽亲党门客，罕相面焉。属姻族间有以利禄为致茂，将以重赂之，答曰：吾为丞相子，非敢语事之私也。而又严奉导训，未尝顷刻敢怠。子之所言，非我能及。

繇是知者益器重之。始自浙西廉帅□公商辟从事，授校书郎，俄转伊阙尉河南士曹。及卫公平回纥，夷上党，上宠以殊功，册拜太尉。特诏授君集贤殿校理。未几，汴帅仆射卢公钧辟奏上僚，兼锡章绶。昆弟二人，朱衣牙简，侍公之前，士林荣之。大中初，公三被谴逐，君亦谪尉蒙山，十有余载，旋丁大艰，号哭北向，请归护伊洛。会先帝与丞相论兵食制置西边事，时有以公前在相位事奏，上颇然之，因诏下许归葬。君躬护显考及昆弟亡姊凡六丧，洎仆馭辈有死于海上者，皆辇其柩悉还。亲属之家，诚节昭感，若有所卫。今皇帝嗣位之岁，御丹凤肆赦，诏移彬县尉。自春离桂林，道中得瘴病，日减眠食，就枕千五百刻，将瞑之夕，遗诫二子，手□---数幅，且曰：必以余赀厚于霜嫂孤女，尔辈无伦之。噫！君之

仁孝著矣，行义彰矣，而福报冥昧，天乎何哉？以咸通三年正月廿八日，卜葬于河南县金谷乡张村先茔礼也。夫人荥阳郑氏，前君七年歿于蒙州。长子庄士，次子庄彦，女曰悬黎，尚幼。呜呼！良友已逝，吾道可嗟，爰写悲肠，铭于贞石。

铭曰：

积善者庆，基德者昌，显矣三世，光于我唐。卫国之盛，功焕岩廊，庆钟今嗣，爰生季常。名以孝彰，节因否显，匪时升沉，在我舒卷。执戟位卑，长沙道蹇，呜呼哲人，与古何远？子子丹□，自南言归，一恸莫及。陨涕□衣。冥寞谁□？霄汉长违，徒嗟刻石，永□泉扉。